

de li s' è ditto, spagnoli haver tolto Rezo, *tamen*, per via, con fondamento non si ha. Se dize, francesi andar contra i spagnoli. *Item*, è venuti alozar a la Cavriana su quel di Mantoa, e al despeto dil marchese i voleno tutte le spexe. *Item*, di Verona si ha, Hironimo di la Torre aver compito tutta la sua compagnia e dete paga a' artesani veronesi, e cussi uno altro contestabele, a la summa di fanti 1500. A Verona ancor non era zonto alcun cavallo, ben se dizeva di brieve doveva venir alcune lanze. Non lassavano intrar persona alcuna in la terra; tien, questo sia per esser mal fornita di zente de' todeschi, *tamen* potria esser i fesseno qualche movesta. Scrive, aver fato utilità ozi di raines 50 a la Signoria per il remeter, e à roto il piron, *adeo* che sparagnerà ducati 270 a la Signoria. *Item* scrive, la Signoria ordena ozi una cossa, doman un' altra, sì che poca stabilità si trova in chi governa qui, a Venecia. Et scrisse la Signoria non si dagi page a' svalisati, salvo che a' Brisigelli. Et zonse tardi questa lettera, e tutti li altri le ebbero, et fu ben facto; et ha pagato ozi uno che li è stà tagliato la man zanca da i nimici. El provedador disse quello voleva far di lui, *unde* la compagnia mormorò, et esso pagador rispose l' avia la man bona per adoperar, et lo avia pagato per exemplo de' altri.

Da poi disnar fo Pregadi, et fo lecto molte lettere, e di Ravena di sier Marin Zorzi el dotor, va orator nostro al vicerè. Come era smontato e andava in campo verso Bologna; stentava de muli e cavalli, e toria a nolo.

Di Roma, fo leto uno breve dil Papa, di 26. Come si doleva dil caxo di Brexa, e si dovesse concluder l'acordo, altramente protestava che lui era *sui juris*; con molte parole persuasorie a questo accordo.

Fu posto, per i savii, che a domino Domenico Busichio, capo di stratioti, stato in Brexa, li sia dà licentia di ritornar in Levante, et a soe fiole, numero tre, morendo lui, li sia data la provision dil padre, zoè la mità a la camera di Candia, a page 4 a l'anno. Et fu presa, 12 di no. Noto. El dito fu quasi causa dil perder di Brexa; è il primo scampò, e fe' aprir la porta, et à vadagnato in questa guerra, si dice, ducati 15 milia.

Fu posto, che a 4 stratioti erano con francesi, nominati in la parte Andrea Capsa, ducati 8, Alexio et Palumbra Capsa, Michali Agali, Marin Celmedi, Jani Luchesi, ducati 4, i quali hanno scapolato dito Domenico Busichio, che uno habi ducati 8 al mexe, li altri tre ducati 4 al mexe di provisione, *ut in parte*; et fu presa. Ave 8 di no.

Fu posto, che ai fioli dil qu. Thodaro Frassina capo di stratioti, è stà morto a Brexa, li sia data la provision havia il padre di ducati 15 al mexe a la camera di Candia, a page 4 a l'anno, *ut in parte*. Et fu presa. Nome, Piero et Comino.

Fu posto, che a tre fradelli dil cavalier Basta capo di stratioti, Andrea, Lazaro, Alexio, fu morto a Brexa, li sia dà la provision l' havia, ch' è ducati 10 al mexe a la camera di Candia, *ut supra*. E fu presa. Nulla di no.

Fu posto, che, atento le differentie di quelli conti di Val de Marin, che per il Colegio siano electi tre zentilhomeni nostri quali siano zudexi di diti conti, e, le sentenze farano, habino appellation a la quantia civil. Et fu presa.

Fu posto, per li savii diti, che la decima numero 4 16 al Monte Novissimo, e la $\frac{1}{2}$ tansa n. 12, si scuodino con il don fino a dì 20 di questo, poi vadi a le cantinele, si scuodi con la pena. Fu presa.

Fu posto, che, atento è in doana molte merchantie venute con le presente galie di Baruto, et di altra sorte, che tutti le vadino a trar uno terzo almeno a termine per tutto di 15 dil presente, *sub pena, ut in parte*. Presa. E che li officii mandino li debitori a doana, acciò, quelli vorano trar, debino pagar li loro debiti, come fu preso.

Fu posto, che, atento è molti debitori di raxon di vachantie de' officii, quali erano deputati a la scansation dil Monte Nuovo, per tanto tutti quelli hanno danari di dita raxon debino, fra certo termine, averli portà a l'oficio di provedadori sopra la camera d' imprestidi, *aliter* pagino come furanti quelli non si àrano manifestato, e *similiter* se son altri debitori a ditto officio, che tutti vadino a pagar in certo termine senza pena, *aliter* pagino con 10 per 100 di pena, *ut in parte*. E fu presa.

Fu posto poi una materia secretissima di la qual fo sagramentà il Consejo, et credo fusse di condur el signor Frachasso a' nostri stipendii, *ut in parte*, la qual messe sier Zorzi Emo savio dil Consejo, e sier Alvise Pixani savio a terra ferma, e alcuni altri di Colegio; e fo gran disputation. Parlò sier Alvise Malipiero savio dil Consejo, poi sier Zorzi Emo, poi sier Gasparo Malipiero savio a terra ferma, poi sier Alvise Pixani, et, ultimo, sier Lorenzo di Prioli fo consier, et iudicò fusse preso di no, e questo per dubito di suo fradelo cardinal, ch' era a Mantoa, e andava legato a Bologna, poi il Papa non vol si toy; sichè non fu preso. E fo sagramentà il Consejo, et *unum* so che ozi doveano esser su Frachasso, e la matina nulla fo ditto, sichè è signal non è stà tolto;